

Date – 02/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Supply minister Pu B. Lalchhanzova'n mi nuai 1 tan kg 1 cheng 20-a ration buhfai an khul theihna tur special ration package buatsaih mek a ni, a ti.**
- 2. Kumin thla 10 kal ta chung khan Mizoram Police te'n ruihhlo chi hrang hrang cheng vaibelchhe 188 leh nuai 64 chuang hu an man.**
- 3. Vawiin khan African Swine Fever (ASF) vawk pulhri avangin vawk 2 chiah a thi.**
- 4. Jharkhand leh Maharashtra assembly inthlan neih tur atan campaign beihpui thlak tan a ni.**

<><><>

SPECIAL RATION PACKAGE

Food, civil supplies & consumer affairs minister Pu B. Lalchhanzova'n mi nuai 1 tan kg 1 cheng 20-a ration buhfai an khul theihna tur special ration package buatsaih mek a ni, a ti.

Serchhip District Consumer Association buatsaih Serchhip khawchhunga za a za LPG Home Delivery kalpui a nih lawmna hun, Serchhip DC Pisapui Hall-a buatsaih a hmanpuina-ah Supply Minister chuan Ration card ennawn hna thawh mek a ni a, a buaipuitute lam atang chuan na deuh taka hma lak an tum thu sawiin, Ration card varin buhfai kg 1 cheng 30-a an leina tura a mawhphurtu ber a nih thu a sawi bawk. Card pawl leh card enga awm awm tak, mahse a awm thei chin bitukin a pelh tawh si avanga leng ta lo eng emaw zat an la awm tih sawi-in mi nuai 1 te tan kg 1 cheng 20 a ration buhfai an khul theihna tur special ration package buatsaih a ni a, hemi atan Ration Card sen hman a ni dawn tih a sawi bawk.

<><><>

HEALTH CARE

Mizoram Sorkarin health care scheme thar Mizoram Universal Health Care Scheme, August 2024-a tlangzarh hman tura a beisei chu a taka kalpui a la ni lo.

Mizoram State Health Care Scheme policy kal lai mek hnuaiah inziahlulhun hawn a ni leh dawn thung. Sorkar thuchhuahin a tarlan danin mipui harsatna sutkianna turin Health Care Scheme hnuaia inziahlulhun hi November ni 30, 2024 thleng hawn a ni dawn a, Thla 6 chhung dam tur a ni ang. Kumin October atanga March 2025 thleng a dam ang. Chhungkaw khatin thla 6 chhung atan Cheng Nuai 1 thleng a bill theih ang. October ni 1, chin hnulama damdawiina admit ten he enrolment thar hi Health Care hnuaia bill nan hman tur a niin Mizoram State Health Care Scheme (MSHCS) hnuaia inziak lut tur hian chhungkaw member bituk zat a awm lova, ration card eng tan inziahlulhun man cheng 100 niin card pawl tan cheng 500 a ni a, Card Var tan inziahlulhun man cheng 1,000 niin Ration card neilo tan pawh inziahlulhun theih tho a nih thu tarlan a ni.

<><><>

POLICE DRUGS SEIZURE

Kumin thla 10 kal ta chhung (January atanga October inkar) khan Mizoram Police te'n ruihhlo chi hrang hrang cheng vaibelchhe 188 leh nuai 64 chuang hu an man.

IGP (law and order) Pu Lalbiakthanga Khiangte hnen atanga Akashvani Aizawl-in thu a dawn danin kumin thla 10 chhung khan ruihhlo kaihhnawihah thubuai 305 ziahlulhun a ni a, ruihhlo tawlh leh zawrh chungchanga inhnawih mi 412 man an ni bawk. Police hian kumin chhung hian heroin an man tam hle a, kg 67 leh gram 82 zet manin cheng vaibelchhe 20 leh nuai 34 hu a chhut a ni a. Heroin kaihhnawihah thubuai 256 ziahlulhun mi 341 an man a ni. Methamphetamine kg 480 leh gram 884 an man a, chu chu cheng vaibelchhe 62 leh nuai 51 hu a chhut a ni a, a kaihhnawihah thubuai 23 ziahlulhun mi 44 man an ni. Police-te hian crystal meth kg 35 leh gram 155 manin crystal meth hralhna hi a to hle a, a vai hian cheng vaibelchhe 105 leh nuai 46 hu a chhut a ni a. Methamphetamine angin a mum a ni lova 'crystalised' a ni. Crystal meth kaihhnawihah hian thubuai 4 ziahlulhun mi 3 man an ni.

Hei bakah hian Police-te hian October thla khan tun hma a hriat hlawh lo tak Caffein (anhydrous) quintal 1 leh kg. 75 zeta rit an man a, an thil man hi cheng nuai 15 leh sing 6 hu vela chhut a ni. Ruihhlo dang an man zingah tunlai thalaite'n an uar thar leh Ganja kg 294 leh gram 925 an man a, hei hi cheng nuai 14, sing 7 leh sang 4 hu a ni. Ruihhlo an man dangte chu Alprozolam leh khuh damdawi (codeine) te a ni a, khuh damdawi hi cheng nuai 1 chuang hu an man a ni.

<><><>

MONITORING

Nimin khan Mizoram State Project Monitoring Committee (MSPMC) Vice Chairman Pu R. L. Rinawma kaihhruaiin Eklavya Model Residential School (EMRS) Tlangnuam-a sak mek an endik.

Aizawl Tlangnuam EMRS-ah hian academic building leh pisa-te, mipa leh hmeichhe hostel, choka leh chaw eikhawmna hall, zirtirtute chenna in tur hlawm thum leh hnathawktu dangte chenna turte an endik nghal bawk a ni.

Heng Building te hi zawh fel vek la ni lo mahse kumin 2024-2025 academic session-ah hian pawl 6 leh pawl 7-ah te admission la-in sorkar laipui EMRS Society thu angin zirna hi tan a ni a. Heng bulding endikah te hian thawm that ngai leh hna hmabak chhonzawm ngai enge emaw zat hmuh a ni a. A hmunah he hna thawh kawnga mawhphurtu sorkar thuneitu leh a hnathawktute MSPMC hian thil awm dan an pui nghal bawk a ni.

He hna hi cheng vaibelchhe sawmhnih pathum chuang senga sak mek a ni a. Tunah hian za zela sawmkua pasarih vel zawh tawh a ni a.

<><><>

POOR ROAD CONDITIONS

Lunglei Thalai Pawl chuan Lunglei leh Tlabung inkar NH 302 kawngpui chhe lutuk chungchangah NHIDCL hnuai Contractor laka lungawi lohna lantir an tum.

An pawl President Pu Lalduhawma chuan vawiin khan chanchinbumite kawmin he kawngpui chhe lutuk vang hian harsatna tam tak a thleng tawh tih sawiin, Pawl hrang hrang pawhin he kawng siam mek hi an vil thin mahse hmasawna hmuh tur a awm lo niin a sawi. Kawng siamtu te hian tihtak zet in he kawng siam that hi an vei lo a ni a ti. Thuchhuah siamin Lunglei Thalai Pawl chuan Phairuang Lei leh Tuichawng Lei phei chu siamtha tur a hmalak miah loh angin vawiin thlengin a la awm niin an sawi a. Hei bakah Hrangchalkawn, Theiriak, Luangmual, Lunglawn leh Sazaikawn huam chin phei chu kutthlak a tlem hle a, NHIDCL leh BRN Company hian inthlahdah takin a remchang apiang hnathawk tur pawt khawmin an nammul mai mai ni a an hriat thu an sawi.

Lunglei Thalai Pawl hian Aizawl-Thenzawl-Lunglei kawngpui chhe lutuk pawh veiin Sorkar in Rs vaibelchhe 3 leh nuai 6 a dah chu High Court ah PIL an thehluat a, High Court chuan PIL hi ngai pawimawhin kumin Oct ni 30 khan Mizoram sorkar chu kawng siam dan thlalak leh Affidavit siama thehluat turin a hriattir tih an sawi a ni.

<><><>

ASF

Vawiin khan African Swine Fever (ASF) vawk pulhri avangin vawk 2 chiah a thi a, vawk thite hi Hnahthial district a Khawhri khua a ni.

Heti hian kumin February ni 9-a Champhai district Leithum khua a ASF vawk pul hri vanga vawk thi hmuhchhuah hmasak ber atanga kumin chhunga he vawk pulhri leng avanga vawk thi tawh zat chu 14,358 a tling tawh a. Tun dinhmunah khaw 252 chu ASF vawk pulhri lenna khua a puan mek a ni. Vawiinah khan vawk damlo 12 chu Lunglei district a khaw pahnihah talh a ni a, Tlabung khua-ah 7 talh niin Ramthar vengah 5 talh a ni. Hemi tiam hian kumin chhunga vawk damlo talh tawh zawng zawng chu 23,808 a tling tawh a ni.

<><><>

AIR News on Social Media

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>

J'KHAND/MAHARASHTRA ELECTIONEERING

Jharkhand leh Maharashtra assembly thar din tura inthlan nei turin party hrang hrang-ten campaign beihpui an thlak tan a, Seat 81 awmna, Jharkhand assembly inthlan neih turah candidate 1211 an awm dawn a, inthlan hi thawh hnihin, Nov. ni 13-ah leh ni 20-ah neih a ni ang.

Inthlan thawh khatnaah hian candidate 683 awmin thawh hnihna chuh turin candidate 528 an awm a, vote hi Nov. ni 23-ah chhiar a ni ang.

Hetih lai hian, naktip, Thawhtanni khi Maharashtra assembly inthlan chuh tuma hming pe lute inhnuhdawh leh theih ni hnukung ber a ni a, Akashvani Corr sawi danin, seat 288 awmna, Maharashtra assembly inthlan chuh tuma hming pek luh zinga 7066 pawm a ni. Inthlan hi thawh khata neih a ni dawn a, Nov. ni 20-ah vote thlak a ni ang.

<><><>